

EUSKAL-ERRIA

REVISTA VASCONGADA

SAN SEBASTIÁN 15 de ENERO DE 1911

IRAKURLEAI

Ogei ta amar garren urtian sartzen da EUSKAL-ERRIA zenbaki onen bidez, eta betiko lanari eraso baño len, agur bat egin nai die bere irakurle zintzo eta atsegiñai, eta euskal-zale guztiai.

Jaunak urte on bat eman diela danoi, beren señaide eta adiskideen ondoan.

Ontaz gañera ez diegu gauza berririk aginduko. Guretzat, zarrak berri dirala, ongi jakina da. Ala beaz, Jose Manterola, lenengo zuzendari bikañak, lenbiziko zenbakian ziyona, esango degu urte berri ontako lanak astekoan.

Alegiñ guztiz jarraituko degu gure izkuntza maitia jasotzen, edertzen, apaintzen, bañan oraindik geyago, zabaltzen.

Ondo biar biarrekua da, bai, gure izkera zarra apaindu eta edertzia; bañan euskaldun askoren espaneñetara urbilldu, eta beren biyotzetan euskeraren aldeko chinparta sortutzia, biarragokua dala iduritzen zaigu.

Orra itz guchitan adierazi, zer izan dan oraiñ arte EUSKAL-ERRIAren orrietan arkitu dana, eta aurrera ere ori bera arkituko dala, ondo gogotik itz ematen degu.

Sayatuko gera beaz, euskal idatzi alik onenak biltzen, neurtitz zorrotz edo ezti eta samurrak azaltzen. Agertuko ditugu jolaz bero eta

biziak gure anaietan euskal-zaletasuna pištutzeko asmoakin. Kontu zarrak berrituko ditugu; baita ere Kondairak illuntasunian estaliak dauzkan egipenak argitaratu. Itz batian, Euskera, era Euskal-erriaren alde egin litekenik ez da egin gabe geldituko.

Gai ontan, Manterola asko jakiñen, Arzak biyotz aundikoen eta Lopez Alen lagun atsegiñen ikasmenak, jarraituko ditugu.

Ayek erakutsitako bideari erasoko diogu, eta izango da bidian argi egingo digun izar laztana, *Euskal itz-jostaldien batzarreak* betiko daukan azalkaia:

¡Bizi bedi Euskera!

EUSKAL-ERRIA

REVISTA VASCONGADA

SAN SEBASTIÁN 30 DE ENERO DE 1911

OARPEN BAT

Aurreroko zenbakian, lenengo itzian egin genduen lenbiziko okerra.

EUSKAL-ERRIA ogei ta amar garren urtian sartzen zala genion, eta ogei ta amabi garrenian esan biar genduan.

Okerra ez da aundiya; bañan aundiya ala chikiya, okerra zuzendu biar da, egiya dan bezela agertu deiyen.

Ogei ta amabi garren urtian sartu zan bada EUSKAL-ERRIA aurreroko zenbakian. Esan baño bi urte geyago ditu beaz.

Bañan, bi urte geyago izatiak ez du esan nai, nekatu, motel, aul edo maškalagua arkitzen danik.

¡Ez oriše! Urtiak sendotu egiten dute, indartu. Eta geruago eta ardura geyagokin, eta geruago eta gogo biziagoakin jarraitzen dio euskera-ren aldeko lan atsegiñari.

Ez da ez EUSKAL-ERRIA len baño otzagua, len baño argalagua arkituko. Bere betiko euskera-ren ganako gogo bizia urtiak sututzen diote geyago eta geyago; baita eman ere aurrerako biar dan kemen sendo eta setatsua.

Aitonatu bada ere, biyotzak gazte irauten diyo; eta gaztetazunezko indarrakin agertuko du, euskera-ren ganako naitazun betikoa.